

四庫全書

集部

欽定四庫全書

集部

詩人玉屑卷三

詳校官庶吉士臣張溥

主事銜臣徐以坤覆勘

覆校官中書臣方大川

校對官學正臣李巖

謄錄監生臣于時和

欽定四庫全書

詩人玉屑卷二

宋 魏慶之 撰

詩評 第三

誠齋品藻中興以來諸賢詩

自隆興以來以詩名家者林謙之范至能陸務觀尤延之蕭東父近時後進有張鉉功父趙蕃昌父劉翰武子黃景說巖老徐似道淵子項安世平甫鞏豐仲至姜夔堯章徐賀恭仲汪經仲權前五人皆有詩集傳世謙之常稱

重其友万翥次雲詩云秋明河漢外月近斗牛旁延之
有云去年江南荒趣逐過江北江北不可住江南歸未
得有寄友人云胷中襍積千般事到得相逢一語無又
台州秩滿而歸云送客漸稀城漸遠歸塗應減兩三程
東夫飲酒云信脚到太古一登岳陽樓不作蒼茫去真成
浪蕩遊三年夜郎客一挖洞庭秋得句鷺飛處看山天
盡頭猶嫌未奇絕更上岳陽樓又荒村三月不肉味併
與瓜茄倚閣休造物於人相補報問天賒得一山秋至

能有云月從雪後皆奇夜天到梅邊別有春功夫云斷
橋斜取路古寺未關門絕似晚唐人詠金林禽花云梨
花風骨杏花粧黃薔薇云已從槐借葉更染菊為裳寫
物之工如此余歸自金陵功夫送末章云何時重來桂
隱軒為我醉倒春風前看人喚作詩中仙看人喚作飲
中仙此詩超然矣昌父云紅葉連邨雨黃花獨徑秋詩
窮真得瘦酒薄不禁愁武子云自鋤明月種梅花又云
吹入征鴻數字秋淵子云煖分煨芋火明借續麻燈又

客路二千零五十向人猶自說歸耕平甫題釣臺醉中
偶爾閒伸脚便被劉郎賣作名恭仲云碎斫生柴爛煮
詩又有姚宋佐輔之一絕句云梅花得月太清生月到
梅花越樣明梅月蕭疎兩奇絕有人踏月繞花行僧顯
萬亦能詩萬松嶺上一間屋老僧半間雲半間三更雲
去作行雨回頭方羨老僧閒又梅詩探枝春色牆頭朶
開入風光竹外梢又河橫星斗三更後月過梧桐一丈
高又有龐右甫者使敵過汴京云蒼龍觀闕東風外黃

道星辰北斗邊月照九衢平似水健兒吹笛內門前

誠齋題品諸楊詩

吾族前輩諱存字正叟諱朴字元素諱杞字元卿諱輔
世字昌英皆能詩元卿年十八第進士其叔正叟賀之
云月中丹桂輸先手鏡裏朱顏正後生吾鄉民俗稻未
熟摘而蒸之舂以為米其飯絕香元素有詩云和露摘
殘雲淺碧帶香炊出玉輕黃余先太中貧常作小茅屋
三間而未有門扉於元卿求一扉元卿以絕句送至云

三間茅屋獨家邨風雨蕭蕭可斷魂舊日相如猶有壁
如今無壁更無門昌英有絕句云碧玉寒塘瑩不流紅
蕖影裏立沙鷗便當不作南溪看當得西湖十里秋

梧州詩人瀘溪先生安福王民瞻名廷珪弱冠貢入京
師太學已有詩名有絕句云江水磨銅鏡面寒釣魚人
在蓼花灣回頭貪看新月上不覺竹竿流下灘紹興間
宰相秦檜力主和我之議鄉先生胡邦衡名銓時為編
修官上書乞斬檜謫新州民瞻送行詩一封朝上九重

關是日清都虎豹寒百辟動容觀奏議幾人回首愧朝
班名高北斗星辰上身落南州瘴海間不待百年公議
定漢廷行召賈生還大厦原非一木支要將獨力柱傾
危癡兒不了公家事男子要為天下奇當日姦諛皆膽
落平生忠義祇心知端能飽喫新州飯在處江山足護
持有歐陽安永上飛語告之除名竄辰州孝宗登極召
為國子監簿以老請奉祠除直敷文閣宮觀

誠齋評李杜蘇黃詩體

問余何意棲碧山笑而不答心自閒桃花流水窅然去
別有天地非人間又相隨遙遙訪赤城三十六曲水回
縈一溪初入千花明萬壑度盡松風聲此李太白詩體
也麒麟圖畫鴻鴈行紫極出入黃金印又白摧朽骨龍
虎死黑入太陰雷雨垂又指揮能事回天地訓練強兵
動鬼神又路經滌瀨雙蓬鬢天入滄浪一釣舟此杜子
美詩體也明月易低人易散歸來呼酒更重看又當其
下筆風雨快筆所未到氣已吞又醉中不覺度千山夜

聞梅香失醉眠又李白畫像西望太白橫峨岷眼高四海空無人大兒汾陽中令君小兒天台坐忘身平生不識高將軍手浣吾足乃敢嗔此東坡詩體也風光錯綜天經緯草木文章帝杼機又澗松無心古鬚鬣天球不琢中粹溫又兒呼不蘇驢失脚猶恐醒來有新作此山谷詩體也

誠齋評為詩隱蓄發露之異

太史公曰國風好色而不淫小雅怨誹而不亂左氏傳

曰春秋之稱微而顯志而晦婉而成章盡而不汙此詩與春秋紀事之妙也近世詞人閒情之靡如伯有所賦趙武所不得聞者有過之無不及焉是得謂好色而不淫乎惟晏叔原云落花人獨立微雨燕雙飛可謂好色而不淫矣唐人長門怨云珊瑚枕上千行淚不是思君是恨君是得為怨誹而不亂乎惟劉長卿云月來深殿早春到後宮遲可謂怨誹而不亂矣近世陳克詠李伯時畫寧王進史圖云汗簡不知天上事至尊新納壽王

妃是得為微為晦為婉為不汙穢乎惟李義山云侍宴
歸來更漏永薛王沉醉壽王醒可謂微婉顯晦盡而不
汙矣

以畫為真以真為畫

杜蜀山水圖云沱水流中座岷山赴此堂白波吹粉壁
青嶂插彫梁此以畫為真也曾吉父云斷崖韋偃樹小
雨郭熙山此以真為畫也

懼翁詩評

因暇日與弟姪輩評古今諸名人詩魏武帝如幽燕老
將氣韻沉雄曹子建如三河少年風流自賞鮑明遠如
饑鷹獨出奇矯無前謝康樂如東海揚帆風日流麗陶
彭澤如絳雲在霄舒卷自如王右丞如秋水芙蓉倚風
自笑韋蘇州如園客獨蘭暗合音徽孟浩然如洞庭始
波木葉微脫杜牧之如銅丸走坂駿馬注坡白樂天如
山東父老課農桑言言皆實元微之如李龜年說天寶
遺事貌悴而神不傷劉夢得如鏤冰雕瓊流光自照李

太白如劉安雞犬遺響白雲覈其歸存恍無定處韓退
之如囊沙背水惟韓信獨能李長吉如武帝承露盤無
補多愁孟東野如埋泉斷劍卧壑寒松張籍如優工行
鄉飲醕獻秩如時有詆氣柳子厚如高秋獨眺霽晚孤
吹李義山如百寶流蘇千絲鐵網綺密瓌妍要非適用
本朝蘇東坡如屈注天潢倒連滄海變眩百怪終歸雄
渾歐公如四瑚八璉止可施之宗廟荆公如鄧艾縋兵
入蜀要以嶮絕為功山谷如陶宏景祇詔入宮析理談

元而松風之夢故在梅聖俞如關河放溜瞬息無聲秦
少游如時女步春終傷婉弱後山如九臯獨唳深林孤
芳冲寂自妍不求賞識韓子蒼如梨園按樂排比得倫
呂居仁如散聖安禪自能竒逸其他作者未易殫陳獨
唐杜工部如周公製作後世莫能擬議

滄浪詩評

大歷以前分明別是一副言語晚唐分明別是一副言
語本朝諸公分明別是一副言語如此見得方許具一

隻眼 盛唐人有似粗而非粗處盛唐人有似拙而非拙處 五言絕句衆唐人是一樣少陵是一樣韓退之是一樣王荊公是一樣本朝諸公是一樣 盛唐人詩亦有一二濫觴晚唐者晚唐人詩亦有一二可入盛唐者要當論其大槩耳 唐人與本朝人詩未論工拙直是氣象不同 唐人命題言語亦自不同雜古人之集而觀之不必見詩望其題引而知其為唐人今人矣大歷之詩高者尚未失盛唐下者漸入晚唐矣晚唐之下

者亦墮野狐外道鬼窟中 或問唐詩何以勝我朝唐人以詩取士故多專門之學我朝之詩所以不及也

詩有詞理意興南朝人尚詞而病於理本朝人尚理而病於意興唐人尚意興而理在其中漢魏之詩詞理意興無跡可尋 漢魏古詩氣象混沌難以句摘晉以還方有佳句如陶淵明採菊東籬下悠然見南山謝靈運池塘生春草之句謝所以不及陶者康樂之詩精工淵明之詩質而自然耳謝靈運無一字不佳黃初之後惟

阮籍詠懷之作極為高古有建安風骨 晉人舍陶淵
明阮嗣宗外惟左太冲高出一時陸士衡獨在諸公之
下顏不如鮑鮑不如謝文中子獨取顏非也 建安之
作全在氣象不可尋枝摘葉靈運之詩已是徹首尾成
對句矣是以不及建安也 謝朓之詩已有全篇似唐
人者當觀其集方知之 戎昱在盛唐為最下已濫觴
晚唐矣戎昱之詩有絕似晚唐者權德輿之詩卻有絕
似盛唐者 權德輿或有似韋蘇州劉長卿處 顧況

詩多在元白之上稍有盛唐風骨處 冷朝陽在大歷才子中最為下 馬戴在晚唐諸人之上 劉滄呂溫亦勝諸人 李瀕不全是晚唐間有似劉隨州處 陳陶之詩在晚唐中最無可觀 薛逢最淺俗大歷以後吾所深取者李長吉柳子厚劉言史權德輿李涉李益耳 大歷後劉夢得之絕句張籍王建之樂府吾所深取耳 李杜二公正不當優劣太白有一二妙處子美不能道子美有一二妙處太白不能作 子美不能

為太白之飄逸太白不能為子美之沉鬱 太白夢遊
天姥吟遠別離等子美不能道子美北征兵車行垂老
別等太白不能作論詩以李杜為準挾天子以令諸侯
也 少陵詩法如孫吳李白詩法如李廣 少陵如節
制之師 李杜數公如金翅擘海香象渡河下視郊島
輩直蛩吟草間耳 觀太白詩者要識真太白處太白
天才豪逸語多率然而成者學者於每篇中要識其安
身立命處可也 少陵詩憲章漢魏而取材於六朝至

其自得之妙則前輩所謂集大成者也人言太白仙才
長吉鬼才不然太白天仙之詞長吉鬼仙之詞耳高
岑之詩悲壯讀之使人感慨孟郊之詩刻苦讀之使人
不懽玉川之怪長吉之瑰詭天地間自欠此體不得

韓退之琴操極高古正是本色非唐諸賢所及 釋皎

然之詩在唐諸僧之上

唐詩僧有法震法照無可護國
靈一清江不特無本齊已貫休

也

集句惟荆公最長胡笳十八拍混然天成絕無痕
跡如蔡文姬肝肺間流出 擬古惟江文通最長擬淵

明似淵明擬康樂似康樂擬左思似左思擬郭璞似郭璞獨擬李都尉一首不似西漢耳 雖謝康樂擬鄴中諸子之詩亦氣象不類至於劉玄休擬行行重行行等篇鮑明遠代君子有所思之作仍是其自體耳和韻最害人詩古人酬唱不次韻此風始盛於元白皮陸而本朝諸賢乃以此而關工遂至往復有八九和者 孟郊之詩憔悴枯槁其氣局促不伸退之許之如此何耶詩道本正大孟郊自為之艱阻耳 孟浩然諸公之詩諷

味之久有金石宮商之聲 唐人七言律詩當以崔灝
黃鶴樓為第一唐人好詩多是征戍遷謫行旅離別之
作往往尤能感動人意 蘇子卿詩幸有弦歌曲可以
喻中懷請為遊子吟泛泛一何悲絲竹厲清聲慷慨有
餘哀長歌正激烈中心悵以摧欲展清商曲念子不能
歸今人觀之必以為一篇重複之甚豈特如蘭膏絲竹
弦歌之語耶古詩正不當以此論也 十九首青青河
畔草鬱鬱園中柳盈盈樓上女皎皎當窓牖娥娥紅粉

粧纖纖出素手一連六句皆用疊字在首今人必以為
句法重複之甚古詩正不當以此論也 任昉哭范僕
射詩一首中凡兩用生字韻三用情字韻夫子值狂生
千齡萬恨生猶是兩義猶我故人情生死一交情欲以
遣離情三字皆同一意天厨禁鬻謂平韻可重押若或
平或仄韻則不可彼以八仙歌言之耳何見之陋耶

詩話謂東坡兩耳字韻二耳義不同故可重押亦非也
劉公幹贈五官中郎將詩昔我從元后整駕至南鄉

過彼豐沛都與君共翱翔元后蓋指曹操至南鄉謂伐
劉表之時豐沛都喻操譙郡也王仲宣從軍詩云籌策
運帷幄一由我聖君聖君亦指操也又曰竊慕負鼎翁
願屬朽鈍姿是欲效伊尹負鼎干湯以伐夏也是時漢
帝尚存而二子之言如此一曰元后一曰聖君正與荀
彧比曹操為高光同科春秋誅心之法二子其何逃古
人贈答多相勉之詞蘇子卿云願君崇令德隨時愛景
光李少卿云努力崇明德皓首以為期劉公幹云勉哉

修令德北面自寵珍杜子美云君若登台輔臨危莫愛
身往往此意高遠夫贈王徹云吾知十年後季子多黃
金金何足道又甚於以名位期人者此達夫偶然漏逗
處也

詩體^上

風雅頌既亡一變而為離騷再變而為西漢五言三變
而為歌行雜體四變而為沈宋律詩五言起於李陵蘇
武或云枚乘七言起於漢武柏梁四言起於漢楚王傅章孟

六言起於漢司農谷永三言起於晉夏侯湛九言起於
高貴鄉公以時而論則有

建安體

漢末年號曹子建父子及鄴中七子之詩

黃初體

魏年號與建安相接其體一也

正始體

魏年號嵇阮諸公之詩

太康體

晉年號左思潘岳二張三陸諸公之詩

元嘉體

宋年號顏鮑謝諸公之詩

永明體

齊年號齊諸公之詩

齊梁體

通兩朝而言之

南北朝體

通魏周而言之與齊梁體一也

唐初體

唐初猶襲陳隋之體

盛唐體

景雲以後開元天寶諸公之詩

大歷體

大歷十才子之詩

元和體

元白諸公

晚唐體本朝體

通前後而言之

元祐體

蘇黃陳諸公

江西宗派體 山谷為之宗

以人而論則有蘇李體 李陵蘇武也

曹劉體 子建公幹也

陶體 淵明也

謝體 靈運也

徐庾體 徐陵庾信也

沈宋體 佺期之間也

陳拾遺體 陳子昂也

王楊盧駱體

王勃楊炯盧照鄰駱賓王也

張曲江體

始興文獻公九齡也

少陵體太白體高逵夫體

高常侍適也

孟浩然體岑嘉州體

岑參也

王右丞體

王維也

韋蘇州體

韋應物也

韓昌黎體柳子厚體韋柳體

蘇州與儀合言之

李長吉體李商隱體

即西崑體也

盧仝體白樂天體元白體微之樂天其體一也

杜牧之體張籍王建體謂樂府之體同也

賈浪仙體孟東野體杜荀鶴體東坡體山谷體后山體
后山本學杜其語之似者但數篇他或似而不全又
其他則本其自體耳

王荊公體公絕句最高其詩得意處高出蘇黃陳之上
而與唐人尚隔一關

邵康節體陳簡齋體陳去非與義也亦江西之派而小異

楊誠齋體 其初學半山后山最後亦學絕句於唐人已

而盡棄諸家之作而別出機杼蓋其自序如此

又有所謂選體 選詩時代不同體製隨異今人例用五

言古詩為選體

柏梁體 漢武帝與羣臣共賦七言每句韻後人謂此體

為柏梁

玉臺體 玉臺集乃徐陵所序漢魏六朝之詩皆有之或

者但謂纖艷者為玉臺體其實不然

西崑體

即李商隱體然兼溫庭筠及本朝楊劉諸公而

名之也

香奩體

韓偓之詩有裾裙脂粉之語有香奩集

宮體

梁簡文傷於輕靡時號宮體

又有古詩有近體

即律詩也

有絕句有雜言有三五七言

自三言而終以七言隋鄭

世翼有此詩

有半五六言

晉傅休奕鴻雁生塞北之篇是也

有一字至七字 唐張南史雪月花草等篇是也又隋人
應詔有三十字詩凡三句七言一句九言不足為法
故不列於此也

有三句之歌

高祖大風歌是也古華山畿二十五首各

三句之詞其他古人詩多如此者

有两句之歌

荆卿易水歌是也又古詩青驄白馬共戲

樂女兒子之類皆兩句之詞

有一句之歌

漢書抱鼓不平董少年一句之歌也又漢

童謠千乘萬騎上北邙梁童謠青絲白馬壽陽來皆
一句也

有口號

或四句或八句

有歌行

古有鞠歌行放歌行長歌行短歌行又有單以

歌名者單以行名者不可枚述

有樂府

漢武帝定郊祀立樂府採齊楚趙魏之聲以入

樂府以其音調可被於絃歌也樂府俱備諸體兼統

衆名也

有楚詞 屈宋以下倣楚詞體者皆謂之楚詞

有琴操 古有水仙操 辛德源所作 別鶴操 高陵牧子所作

曰謠 沈炯有獨酌謠 王昌齡有瑩篴謠 穆天子之傳有

白雲謠也

曰吟 古詞有隴頭吟 樂府有梁父吟 相如有白頭吟

曰詞 選有漢武秋風詞 樂府有木蘭詞

曰引 古曲有霹靂引 走馬引 飛龍引

曰詠 選有五君詠 唐儲光羲有羣鷗詠

曰曲 古有大堤曲梁簡文有烏栖曲

曰篇 選有名都篇京洛篇白馬篇

曰唱 魏明帝有氣出唱

曰弄 古樂府有江南弄

曰長調曰短調有四聲有八病 四聲設於周顒八病嚴

於沈約

又有以嘆名者 古詞有楚妃嘆明君嘆

以怨名者 文選有四怨樂府有獨處怨

以樂名者 齊武帝有估家樂朱臧質有石城樂

以別名者 杜子美有無家別垂老別新婚別也

以思名者 太白有靜夜思

有全篇雙聲疊韻者 東坡經字韻詩是也

有全篇字皆平聲者 天隨子夏日詩四十字皆平聲又

有一句全平聲一句全仄聲

有全篇字皆仄聲者 梅聖俞酌酒與婦飲之詩是也

有律詩上下句雙用韻者 第一句第三五七句押一仄

韻第二句第四第六句押一平韻唐章碣有此體不足為法謾列於此以備其體耳又有四句平入之體四句仄入之體無關詩道今皆不取

有轆轤韻者

雙入雙出

有進退韻者

一進一退

有古詩一韻兩用者

文選曹子建美女篇用兩難字謝

康樂述祖德詩用兩人字其後多有之

有古詩一韻三用者

文選任彦昇哭范僕射詩三用情

字也

有古詩三韻六七用者

古焦仲卿妻詩是也

有古詩重用二十許韻者

焦仲卿妻詩是也

有古詩旁取六七許韻者

韓退之此日足可惜篇是也

凡雜用東冬江陽庚青六韻歐陽公謂退之遇寬韻則故旁入他韻非也此乃用古韻耳於焦韻自見之

有古詩全不押韻者

古採蓮曲是也

有律詩至百五十韻者

少陵有古韻律詩白樂天亦有

之而本朝王黃州有百五十韻五言律

有律詩止三韻者

唐人有六句五言律如李益詩漢家

今上郡秦塞古長城有日雲常慘無風沙自驚當今天子聖不戰四夷平是也

有律詩徹首尾對者

少陵多此體不可槩舉

有律詩徹首尾不對者

盛唐諸公有此體如孟浩然詩

掛席東南望青山水國遙軸轡爭利涉來往接風潮問我今何適天台訪石橋坐看霞色晚疑是石城標

又水國無邊際之篇 又李太白牛渚西江夜之篇
皆文從字順音韻鏗鏘八句皆無對偶

有後章字接前章者

選曹子建贈白馬王彪之詩是也

有四句通者

如少陵神女峯娟妙昭君宅有無曲留明

怨惜夢盡失歡娛是也

有絕句折腰者有八句折腰者有擬古有連句有集句

有分題

古人分題或各賦一物如云送某人分題得某

物也亦曰探題

有分韻有用韻有和韻有借韻

如押四支韻可借八微

或十二齊一韻也

有協韻

楚詞及選詩多用協韻

有今韻有古韻

如韓退之此日足可惜詩用古韻也蓋

選詩多如此

有古律

陳子昂及盛唐諸公多此體

有今律有領聯有發端有落句

結句也

有十字對

劉春虛滄浪千萬里日夜一孤舟

有十字句

常建曲徑通幽處禪房花木深等是也

有十四字對

劉長卿江客不堪頻北望塞鴻何事又南

飛是也

有十四字句

崔顥黃鶴一去不復返白雲千載空悠悠

太白鸚鵡西飛隴山去芳洲之樹何青青是也

有扇對

又謂之隔句對如鄭都官昔年共照松溪影松

折荒碑僧已無今日還思錦城事雪銷花謝夢何如

等是也蓋以第一句對第三句第二句對第四句

有借對 孟浩然厨人具雞黍稚子摘楊梅太白水春雲
母碓風掃石插花少陵竹葉於人既無分菊花從此
不須開言之者有是也

有就對者 又曰當句有對如少陵小院迴廊春寂寂浴
鳬飛鷺晚悠悠李嘉祐孤雲獨鳥川光暮萬井千山
一氣秋是也前輩於文亦多此體如王勃龍光射斗
斗之墟徐孺下陳蕃之榻乃就句對也

論雜體則有風人 上句述一語下句釋其義如古子夜

歌讀曲歌之類多用此體

藁砧

古樂府藁砧今何在山上復安山何日大刀頭破

鏡飛上天

五雜俎

見樂府

兩頭纖纖

亦見樂府

盤中

玉臺集蘇伯玉妻作寫之盤中屈曲成文也

迴文

起於竇滔之妻織錦以寄其夫也

反覆

舉一字而誦皆成句無不押韻反覆成文也李公

詩格有此二十字詩

離合

字相拆合成文孔融漁父屈節之詩是也

雖不關詩道之重輕其體制亦古至於建除

鮑明遠有

建除詩詩每句首冠以建除平滿等字其詩雖佳蓋

鮑本工詩非因建除之體而佳也

字謎人名卦名數名藥名州名之詩只成戲論不足為法也

又有六甲十屬之類及藏頭歇後等體今皆削之近

世有李公詩格泛而不備惠洪天厨禁鬻最為誤人
今此卷有旁參二書者益其是處不可易也

詩體

下

總論

古人文章自應律度未嘗以音韻為主自沈約增崇韻
學其論文則曰欲使宮羽相變低昂殊節若前有浮聲
則後須切響一篇之內音韻盡殊兩句之中輕重悉異
妙達此旨始可言文自後浮巧之語體製漸多如傍犯

蹉對假對雙聲疊韻之類詩又有正格偏格類例極多故有三十四格十九圖四聲八病之類今略有數條如徐陵云陪遊馭娑騁纖腰於結風長樂鴛鴦奏新聲於度曲又云厭長樂之踈鐘勞中宮之緩箭雖兩長樂義不同不為重複此為傍犯如九歌云蕙艸蒸兮蘭芳莫桂酒兮椒漿蒸蕙艸對莫桂酒今倒用之謂之蹉對又自朱耶之狼狽致赤子之流離不唯赤對朱耶對子兼狼狽流離乃獸名對鳥名又如厨人具雞黍稚子摘楊

梅以難對楊如此之類皆為假對如幾家村草裏吹唱
隔江聞幾家村草吹唱隔江皆雙聲如月影侵簷冷江
光逼履清侵簷逼履皆疊韻詩第二字側入謂之正格
如鳳歷軒轅紀龍飛四十春之類第二字平入謂之偏
格如四更山吐月殘夜水明樓之類唐名輩詩多用正
格如杜甫詩用偏格者十無二三 筆談

江左體

引韻便失粘既失粘則若不拘聲律然其對偶特精則

謂之骨含蘇李體浣花流水水西頭主人為卜林塘幽
已知出郭少塵事更有澄江銷客愁無數蜻蜓齊上下
一雙鸕鶿對沉浮東行萬里堪乘興須向山陰上小舟
杜子美卜居

蜂腰體

領聯亦無對偶然是十字叙一事而意貫上二句及頸
聯方對偶分明謂之蜂腰格言若已斷而復續也下第
唯空囊如何住帝鄉杏園啼百舌誰醉在花傍淚落故

山遠病來春草長知音逢豈易孤棹負三湘

賈島下第詩

隔句體

破題與領聯便作隔句對若施之於賦則曰幾思靜話
對夜雨之禪床未得重逢照秋燈於影室也幾思聞靜
話夜雨對禪床未得重相見秋燈照影堂孤雲終負約
薄宦轉堪傷夢遶長松榻遙焚一炷香

鄭谷弔僧詩

偷春體

其法領聯雖不拘對偶疑非聲律然破題已的對矣謂

之偷春格言如梅花偷春色而先開也無家對寒食有
淚如金波斫却月中桂清光應更多仇離放紅蘂想像
嚙青娥牛女漫愁思秋期猶渡河杜子美寒食月詩

折腰體

謂中失粘而意不斷渭城朝雨裊輕塵客舍青青柳色
新勸君更盡一杯酒西出陽關無故人王維贈別

絕絃體

其語似斷絃而意存如絃絕而其意終在也燕鴻去後

湖天遠欲寄知音問水居七歲弄竿今八十錦鱗吞釣
不吞書僧謙寄遠

五仄體

晏元獻守汝陰梅聖俞往見之將行公置酒潁河上因
言古人章句中全用平聲製字穩帖如枯桑知天風是
也恨未見側字詩聖俞既引舟遂作五仄體寄公云月
出斷岸口影照別舸背且獨與婦飲頗勝俗客對月漸
上我席暝色亦稍退豈必在秉燭此景已可愛

西清詩話

回文體

謂倒讀亦成詩也潮隨暗浪雪山傾遠浦漁舟釣月明
橋對寺門松逕小巷當泉眼石波清迢迢遠樹江天曉
靄靄紅霞晚日晴遙望四山雲接水碧峰千點數鷗輕
東坡題金山寺

五句法

此格卽事遣興可作如題物贈送之類則不可用曲江
蕭條秋氣高芰荷枯折隨風濤遊子空嗟垂二毛白石

素沙亦相蕩哀鴻獨叫求其曹

杜子美

即事非今亦非

古長歌激烈梢林莽比屋豪華固難數吾人甘作心似
灰弟姪何傷淚如雨杜子美

六句法

此法但可放言遺興不可寄贈杜子美云烈士惡多門
小人自同調名利苟可取殺身傍權要何當官曹清爾
輩堪一笑山谷云三公未白首十輩擁朱輪只有人看
好何益百年身但願身無事清樽對故人

促句法

止於兩體三句一換韻或平聲或側聲皆可江南秋色
推煩暑夜來一枕芭蕉雨家在江南白鷗浦一生未歸
鬢如織傷心日暮楓葉赤偶然得句應題壁 蘆花如
雪洒扁舟正是滄江蘭杜秋忽然驚起散沙鷗平生生
計如轉蓬一身長在百憂中鱸魚正美負秋風

平頭換韻法

東坡作太白贊云天人幾何同一漚謫仙非謫乃其遊

揮斥八極隘九州化為兩鳥鳴相酬一鳴一止三千秋
開元有道為少留縻之不得矧肯求東望太白橫峨岷
眼高四海空無人大兒汾陽中令君小兒天台坐忘身
平生不識高將軍手浣吾足矧敢嗔作詩一笑君應聞
一韻七句方換韻又是平聲其法不得雙殺雙殺者不
得此法也禁鬱

促句換韻法

魯直觀伯時畫馬詩云儀鸞供帳饗蟲行翰林濕薪爆

竹聲風簾官燭淚縱橫木穿石槃未渠透坐窓不遨令
人瘦貧馬百鬻逢一豆眼明見此玉花驄徑思着鞭隨
詩翁城西野眺尋小紅此格禁臠謂之促句換韻其法
三句一換韻三疊而止此格甚新人罕用之余嘗以此
格為鄙句云青玻瓈色瑩長空爛銀盤挂屋山東晚涼
徐度一襟風天分風月相管領對之技癢誰能忍吟哦
自恨詩才窘掃寬露坐發興新浮蛆琰琰拋青春不妨
舉醖成三人漁隱

拗句

魯直換字對句法如只今滿坐且尊酒後夜此堂空月
明清談落筆一萬字白眼舉觴三百盃田中誰問不納
履坐上適來何處蠅鞦韆門巷火新改桑柘田園春向
分忽來舟去值花雨寄得書來應麥秋其法於當下平
字處以仄字易之欲其氣挺然不羣前此未有人作此
體獨魯直變之茗溪漁隱曰此體本出於老杜如寵光
蕙葉與多碧點注桃花舒小紅一雙白魚不受釣三寸

黃甘猶自青外江三峽且相接斗酒新詩終日踈負鹽
出井此溪女打鼓發舡何郡郎沙上草閣柳新暗城邊
野池蓮欲紅似此體甚多聊舉此數聯非獨魯直變之
也今俗謂之拗句者是也禁齋

七言變體

律詩之作用字平側世固有定體衆共守之然不若時
用變體如兵之出奇變化無窮以驚世駭目如老杜詩
云竹裏行厨洗玉盤花邊立馬簇金鞍非關使者徵求

急自識將軍禮數寬
百年地闢柴門迥
五月江深草閣寒
看弄漁舟移白日
老農何有罄交歡
此七言律詩之變體也
漁隱

絕句變體

韋蘇州云南望青山
滿禁闌曉陪鴛鴦
正差池共愛朝來
何處雪蓬萊宮裏
拂松枝老杜云山
瓶乳酒下青雲氣
味濃香幸見分鳴
鞭走送憐漁父洗
盞開嘗對馬軍此
絕句律詩之變體也
同上

第三句失粘

七言律詩至第三句便失粘落平側亦別是一體唐人
用此甚多但今人少用耳如老杜云搖落深知宋玉悲
風流儒雅亦吾師悵望千秋一灑淚蕭條異代不同時
江山故宅空文藻雲雨荒臺豈夢思最是楚宮俱泯滅
舟人指點到今疑嚴武云漫向江頭把釣竿懶眠沙草
愛風湍莫倚善題鸚鵡賦何須不著鵝鵝冠腹中書籍
幽時曬肘後醫方靜處看興發會能馳駿馬終須重到

使君灘韋應物云夾水蒼山路向東東南山豁大河通
寒樹依微遠天外夕陽明滅亂流中孤村幾歲臨伊岍
一雁初晴下朔風為報洛橋遊宦侶扁舟不繫與心同
此三詩起頭用側聲故第三句亦用側聲

八句仄八格

唐末蜀川有唐求放曠疎逸方外人也吟詩有所得即
將橐拏為丸投入瓢中後卧病投瓢於江曰茲文苟不
沉沒得之者方知吾苦心耳瓢至新渠江有識者曰此

唐山人詩瓢也接得十絕二三題鄭處士隱居曰不信
最清曠及來愁已空數點石泉雨一溪霜葉風葉在有
山處道成無事中酌盡一盃酒老夫顏亦紅古今詩話

進退格

鄭谷與僧齊已黃損等共定今體詩格云凡詩用韻有
數格一曰葫蘆一曰轆轤一曰進退葫蘆韻者先二後
四轆轤韻者雙出雙入進退韻者一進一退失此則繆
矣余按倦遊錄載唐介為臺官廷疏宰相之失仁廟怒

謫英州別駕朝中士大夫以詩送行者頗衆獨李師中待制一篇為人傳誦詩曰孤忠自許衆不與獨立敢言人所難去國一身輕似葉高名千古重於山並游英俊顏何厚未死姦諛骨已寒天為吾君扶社稷肯教夫子不生還此正所謂進退韻格也按韻畧難字第二十五山字第二十七寒字又在二十五而還字又在二十七一進一退誠合體格豈率爾而為之哉近閱冷齋夜話載當時唐李對答語言乃以此詩為落韻詩蓋渠伊不

見鄭谷所定詩格有進退之說而妄為云云也

湘素雜記

子蒼於五言八句近體詩亦用此格其詩云盜賊猶如此蒼生困未蘇今年起安石不用哭包胥子去朝行在人應問老夫髭鬚衰白盡瘦地日攜鉏蓋蘇夫在十虞字韻胥鉏在九魚字韻

平側各押韻

唐末有章竭者乃以八句詩平側各有一韻如東南路盡吳江畔正是窮愁暮雨天鷗鷺不嫌斜兩岸波濤欺

得送風船偶逢島寺停帆看深羨漁翁下釣眠今古若
論英達笑鴟夷高興固無邊自號變體此尤可怪者也
蔡寬夫詩話

雙聲疊韻

南史謝莊傳曰王元謨問莊何者為雙聲何者為疊韻
答曰互護為雙聲礪礪為疊韻某按古人以四聲為切
韻紐以雙聲疊韻必以五音為定蓋謂東方喉聲為木
音西方舌聲為金音南方齒聲為火音北方唇聲為水

音中央牙聲為土音也雙聲者同音而不同韻也疊韻者同音而又同韻也互護同為唇音而二字不同韻故謂之雙聲礪礪同為牙音而二字又同韻故謂之疊韻若彷彿熠燿騏驎慷慨伊喔霖霖皆雙聲也若侏儒童蒙崆峒龍從螳螂滴瀝皆疊韻也按李羣玉詩曰方穿詰曲崎嶇路又聽鉤輶格礪聲詰曲崎嶇乃雙聲也鉤輶格礪乃疊韻也

學林新編

東坡作吃語詩江干高居堅關扃耕犍躬駕角掛經孤

航繫舸捩焚隔笳鼓過軍雞狗驚解襟顧景各箕踞擊
劒高歌幾舉觥荆筭供膾愧攬臚乾鍋更憂甘瓜羹漫
叟詩話

扇對法

此與前隔句體同

律詩有扇對格第一與第三句對第二與第四句對如
杜少陵哭台州司戶蘇少監詩云得罪台州去時危棄
碩儒移官蓬閣後穀貴歿前夫東坡和鬱孤臺詩云解
后陪車馬尋芳謝眺洲淒涼望鄉國得句仲宣樓又唐

人絕句亦用此格如去年花下留連飲暖日夭桃鶯亂啼今日江邊容易別淡煙衰草馬頻嘶之類是也漁隱

蹉對法

僧惠洪冷齋夜話載介甫詩云春殘葉密花枝少睡起茶多酒盞踈多字當作親世俗傳寫之誤洪之意蓋欲以少對密以踈對親予作荆南教官與江朝宗匯者同僚偶論及此江云惠洪多妄誕殊不曉古人詩格此一聯以密字對踈以多字對少正交股用之所謂蹉對法

也藝苑雌黃

離合體前雖不取此特存其大畧耳

藥名詩起自陳亞非也東漢已有離合體至唐始著藥名之號如張籍答鄱陽客詩云江皋歲暮相逢地黃葉霜前半夏枝子夜吟詩向松桂心中萬事豈君知是也

西清詩話

禽言詩當如藥名詩用其名字隱入詩句中造語穩貼無異尋常詩乃為造微入妙如藥名詩云四海無遠志

一溪甘遂心遠志甘遂二藥名也禽言詩云喚起窓全
曙催歸日未西喚起催歸二禽名也梅聖俞禽言詩如
泥滑滑苦竹岡之句皆善造語者也

漁隱

人名

荆公詩有老景春可惜無花可留得莫嫌柳渾青終恨
李太白之句以古人姓名藏句中蓋以文為戲或者謂
前無此體自公始見之余讀權德輿集其一篇云藩宣
秉戎寄衡石崇勢位言紀信不留弛張良自愧樵蘇則

為慙瓜李斯可畏不顧榮宦尊每陳農畝利家林類巖
巘負郭躬歛積忌滿寵生嫌養蒙恬勝利踈鍾皓月曉
晚景丹霞異澗谷永不變山梁異無累論自王符肇學
得展禽志從此直不疑支離踈世事則權德輿已嘗為
此體乃知古今文章之變殆無遺蘊德輿在唐不以詩
名然詞亦雅暢此篇雖主意在別立體然不失為佳製
也石林詩話

藥名

嘗見近世作藥名詩或未工要當字則正用意須假借
如日側栢陰斜是也若側身直上天門東風月前湖夜
湖東二字即非正用孔毅夫有詩云鄙性嘗山野尤甘
草舍中鉤簾陰卷栢障壁坐防風客土依雲實流泉架
木通行當歸老矣已逼白頭翁又此地龍舒國池隍獸
血餘木香多野橘石乳最宜魚古瓦松杉冷旱天麻麥
踈題詩非杜若牋膩粉難書

漫叟詩話

詩人玉屑卷二

欽定四庫全書

詩人玉屑卷三

宋 魏慶之 撰

句法

有三種句

命屬題意如有神助歸於自然之句
命題立意援筆立成歸於容易之句
命題用意求之不得歸於苦求之句

金針

錯綜句法

老杜云紅稻啄殘鸚鵡粒碧梧棲老鳳凰枝舒王云綠
成白雪桑重綠割盡黃雲稻正青鄭谷云林下聽經秋
苑鹿江邊掃葉夕陽僧以事不錯綜則不成文章若平
直叙之則曰鸚鵡啄殘紅稻粒鳳凰棲老碧梧枝以紅
稻於上以鳳凰於下者錯綜之也言綠成則知白雪為
絲言割盡則知黃雲為麥也秦少游得其意特發奇語
其作睡足軒則曰長年憂患百端慵開片僧坊頗有功
地徹蔽虧僧界靜人除荒穢玉奩空青天併入揮毫裏

白鳥時來隱几中，最是人間佳絕處。
夢殘風鐵響丁東。
冷齋

影畧句法

鄭谷詠落葉未嘗及彫零飄墜之意，人一見之自然知為落葉。詩曰：返蟻難尋穴，歸禽易見窠。滿廊僧不厭，一箇俗嫌多。
冷齋

象外句

唐僧多佳句，其琢句法比物以意而不指言一物謂之

象外句如無可上人詩曰聽雨寒更盡開門落葉深是落葉比雨聲也又曰微陽下喬木遠燒入秋山是微陽比遠燒也用事琢句妙在言其用而不言其名耳

折句

六一居士詩云靜愛竹時來野寺獨尋春偶過溪橋俗謂之折句盧贊元雪詩云想行客過梅橋滑免老農憂麥壠乾效此格也余亦嘗云鸚鵡盃且酌清濁麒麟閣

懶畫丹青

漁隱

佳句

宋荅公見公佳句皆書於齋壁如無可奈何花落去似
曾相識燕歸來靜尋啄木藏身處閒看遊絲到地時樓
臺冷落收燈夜門巷蕭條掃雪天已定復搖春水色似
紅如白野棠花之類後人不可及

青箱雜記

雄偉句

吳江長橋詩世稱三聯予美云雲頭灩灩開金餅水面
沉沉卧綠虹楊次公云八十丈虹晴卧影一千頃玉碧

無瑕鄭毅夫云挿天蟠螭玉腰闊跨海鯨鯢金背高歐
永叔謂子美此句雄偉余謂次公毅夫兩聯麗豪較以
子美之句二公殊少醞藉也

漁隱

雄健句

句法之學自是一家工夫昔嘗問山谷耕田欲雨刈欲
晴去得順風來者怨山谷云不如千巖無人萬壑靜十
步回頭五步坐此專論句法不論義理蓋七言詩四字
三字作兩節也此句法出黃庭經自上有黃庭下關元

已下多此體張平子四愁詩句句如此雄健穩愜至五
言詩亦有三字二字作兩節者老杜云不知西閣意肯
別定留人肯別耶定留人耶山谷尤愛其深遠閒雅盖
與上七言同

詩眼

一人名而分用之句

一人名而分用之者如劉越石宣尼悲獲麟西狩泣孔
邱謝惠連雖好相如達不同長卿慢等語若非前後相
映帶殆不可讀然要非全美也唐初餘風猶未殄陶冶

至杜子美始淨盡矣

兩句純好難得

劉昭禹云五言如四十個賢人着一個屠酤不得覓句
若掘得玉匣子有底有益但精心必獲其寶然昔人園
林變鳴禽竟不及池塘生春草餘霞散成綺不及澄江
靜如練春水船如天上坐不若老年花似霧中看閒几
硯中窺水淺不如落花徑裏得泥香停杯嗟別久不及
對月喜家貧神林社日鼓不若茅屋午時雞此數公未

始不精心以此知其全寶未易多得

沿溪

兩句不可一意

晉宋間詩人造語雖秀拔然大抵上下句多出一意如
魚戲新荷動鳥散餘花落蟬噪林逾靜鳥鳴山更幽之
類非不工矣終不免此病

蔡寬夫詩話

王荊公以風定花猶落對鳥鳴山更幽則上句靜中有
動下句動中有靜

沈括存中述筆談

置早意於殘晚中置靜意於喧動中

唐詩曰海日生殘夜江春入暮年置早意於殘晚中有
曰驚蟬移別柳聞雀墮閒庭置靜意於喧動中

山谷

句中有眼

句中眼者世九不能解王荊公欲新政作雪詩曰勢合
便宜包地勢功成終欲放春回農家不念豐年瑞只欲
青雲萬里開

冷齋

句中當無虛字

或問余東坡有言詩至於杜子美天下之能事畢矣老

杜之前人固未知有老杜後世安知無過老杜者余曰
如一片花飛減却春若詠落花則語意皆盡所以古人
既未到決知後人更無好語如畫馬詩云玉花却在御
榻上榻上庭前屹相向則曹將軍能事與造化之功皆
不可以有加矣至其他吟詠人情摸寫物景皆如是也
老杜謝嚴武詩云雨映行宮辱贈詩山谷云只此雨映
兩字寫出一時景物此句便雅健余然後曉句中當無

虛字

詩眼

句法不當重疊

淮海小詞云杜鵑聲裏斜陽暮東坡曰此詞高妙但既云斜陽又云暮則重出也欲改斜陽作簾櫳余曰既言孤館閉春寒似無簾櫳公曰亭傳雖未必有簾櫳有亦無害余曰此詞本摸寫牢落之狀若曰簾櫳恐損初意先生曰極難得好字當徐思之然余因此曉句法不當

重疊

詩眼

言簡而意不遺之句

或有稱詠松句云影搖千尺龍蛇動聲撼半天風雨寒者一僧在坐曰未若雲影亂鋪地濤聲寒在空或以語聖俞聖俞曰言簡而意不遺當以僧語為優

王直方詩話

句豪而不畔於理

吟詩喜作豪句須不畔於理方善如東坡觀崔白冬景圖云扶桑大繭如甕蓋天女織綃雲漢上往來不遣鳳銜梭誰能鼓臂投三丈此語豪而甚工石敏若橘林文中詠雪有燕南雪花大於掌冰柱懸簷一千丈之語豪

則豪矣然安得爾高屋耶余觀李太白北風行云燕山
雪花大如席秋浦歌云白髮三千丈其句可謂豪矣奈
無此理何如秦少游秋日絕句云連卷雌蜺挂西樓逐
雨追晴意未休安得萬粧相向舞酒酣聊把作纏頭此
語亦豪而工矣

藝苑雌黃

句中有問答之詞

古人造語俯仰紆餘各有態小麥青青大麥枯誰當穫
者婦與姑丈夫何在西擊胡凡此句中每涵問答之詞

大麥乾枯小麥黃問誰腰鑣胡與羌句法實有所自

潘

子真詩話

誠齋論一句有三意

詩有一句七言而三意者杜云對食暫餐還不能退之
云欲去未到先思回有一句五言而兩意者陳後山云
更病可無醉猶寒已自和

誠齋論驚人句

詩有驚人句杜山水障堂上不合生楓樹怪底江山起

煙霧又斫却月中桂清光應更多白樂天云遙憐天上
桂華孤為問姮娥更要無月中幸有閒田地何不中央
種兩株韓子蒼衡嶽圖故人来自天柱峯手提石廩與
祝融兩山坡陲幾百里安得置之行李中此亦是用東
坡云我持此石歸袖中有東海杜牧之云我欲東召龍
伯公上天揭取北斗柄蓬萊頂上斡海水水盡見底看
海空李賀云女媧鍊石補天處石破天驚逗秋雨

誠齋稱李大方警言句

李方叔之孫大方字允蹈少時嘗作思故山賦諸公間
稱之以為似邢居實晚得一鷗冠今為雜買場寄予詩
一篇多有警句如三百年来今幾秋天地自老江自流
如笛聲吹起白玉盤正照御前楊柳碧如可憐一代經
綸業不抵鍾山幾首詩如後院落花人不到黃鸝飛逐
石榴陰大似唐人

誠齋論警句

士大夫間有口傳一兩聯可喜而莫知其本者如人

情似紙番番薄世事如碁局局新又飽諳世事慵開眼
會盡人情只點頭又薄有田園歸去好苦無官况莫來
休又賀人休官重碧杯中天更大軟紅塵裏夢初收竟
不知何人詩也又有嘲巧宦而事反拙者當初只謂將
勤補到底翻為弄巧成此本可笑

陵陽論警句

公嘗曰昨嘗與呂居仁閒論前輩所作上元詩居仁曰
晏元獻云梅臺冷落收燈夜巷清虛掃雪天最佳直

是說得出不可及後見呂郎中有詩云江城氣候猶含
雪草市人家已掛燈豈用晏意耶

室中語

少陵坡谷句法

前人文章各有一種句法如老杜今君起拖春江流予
亦江邊具小舟同心不減骨肉親每語見許文章伯如
此之類老杜句法也東坡秋水今幾竿之類自是東坡
句法魯直夏扇日在搖行樂亦云聊此魯直句法也學
者若能遍考前作自然度越流輩

呂氏童蒙訓

蔣道士詩句

衡州蔣道士云石壓雪斜出岸懸花倒生後因太守怒
不掃地辱之守見詩愛而召之乃上詩曰春來不是人
慵掃為惜莓苔襯落花守悔焉欲招之飲蔣有詩謝曰
敲開敗籜露新竹拾上落花香舊枝復為湘人所重

青瑣

省題詩句

湘靈鼓瑟落句曲終人不見江上數峯青含蓄不盡意
或謂錢起得之夢未必然也韓昌黎精衛銜石填海篇

有人皆譏造次我獨賞專精則語意超詣不可以加矣

灘聲句

宿龍宮灘詩浩浩復湯湯灘聲抑更揚魯直云退之裁
聽水句尤見工所謂浩浩湯湯抑更揚者非客裏夜卧
飽聞此聲安能周旋妙處如此耶

韓詩補注

清健句

三過門中老病死一彈指頃去來今句法清健天生對
也陸務觀詩云老病已全惟欠死貪嗔雖盡尚餘癡不

失望東坡而近世亦無人能到此 藜藿野人詩話

詩句可入畫

呂居仁春日即事云雪消池館初春後人倚闌干欲暮時此自可入畫人之情意物之容態二句盡之 遺珠

燕詩

歐陽公愛王君玉燕詞煙徑掠花飛遠遠曉窓驚夢語匆匆梅聖俞以為不若李堯夫花前語澁春猶冷江上

飛高雨乍晴 遺珠

唐人句法

朝會

闔闔開黃道衣冠拜紫宸

杜甫

退朝花底散歸院柳邊迷

杜甫晚出左掖

碧霄傳鳳吹旭日在龍旗

楊巨源春日獻聖壽

爐煙添柳重禁漏出花遲

同前

鈎陳霜騎肅御道雨師清

皇甫冉東郊迎氣

御爐香焰暖馳道玉聲寒

竇叔向春日應制

金闕曉鐘開萬戶玉階仙仗擁千官

崔灝早朝

花明劍珮星初沒柳拂旌旗露未乾

同前

宮掖

春風開紫殿天樂下珠樓

李白宮中行樂詞

鶯歌聞太掖鳳吹繞瀛洲

同前

鐘來宮轉漏月過閣移陰

喻坦之宿省中

鶯歸漢宮柳花隔杜陵煙

郎士元春宴

玉階聞墜葉羅幌見飛螢

沈佺期長門怨

綉戶香風暖紗窓曙色新

李白

夢裏君王近宮中河漢高

劉方平長信宮

竹外仙亭出花間輦路分

喬知之應制

一聲啼鳥禁門靜滿地落花春日長

王隨

長樂鐘聲花外盡龍池柳色雨中深

錢起闕下贈裴舍人

懷古

粉牆猶竹色虛閣自松聲

杜甫

野花留寶靨蔓草見羅裙

杜甫琴臺

江山九秋後風月六朝餘

杜牧企望

竹送清溪月苔移玉座春

杜甫玄元皇帝廟

輦路江楓暗宮庭野草春

司空曙金陵懷古

峴首羊公愛長沙賈誼愁

孟浩然送王昌齡之嶺南

二女竹上淚湘妃水底魂

韓愈泊三江口

碑已無文字人猶敬子孫

任藩經墮淚碑

野廟向江春寂寂斷碑無字草芊芊

李羣玉黃陵廟

晴川歷歷漢陽樹春草淒淒鸚鵡洲

崔灝登黃鶴樓

送別

人分千里外興在一杯中

李白別宋之悌

飲中相顧色送後獨歸情

韓愈

人由戀德泣馬亦別羣鳴

韓愈寄王中丞

九江春水濶三峽暮雲深

陳陶湓城贈別

住接猿啼處行逢鴈過時

許渾送客歸峽州

塞草連天暮邊風動地秋

張侶送王相公赴幽州

楊柳北歸路蒹葭南渡舟

許渾泊松江渡

落葉淮邊雨孤山海立秋

錢起送人

長亭叫月新秋鴈官渡含風古樹蟬

武元衡送韋秀才赴滑州

蟬聲驛路秋山裏草色河橋落照中

韓翃送人歸青州

地名

水落魚龍夜山空烏鼠秋

杜甫

弓抱關西月旗翻渭北風

岑參送李太保充渭北節度

雲送關西雨風傳渭北秋

岑參客舍寄李嚴二山人

秋草靈光殿寒雲曲阜城

韓翃送故人歸魯

明月雙流水清風八詠樓嚴維送人入金華

樓看滄海日門聽浙江潮宋之問天竺寺

人離京口日潮送岳陽船周賀送楊岳

江流嶠冢雨帆入漢陰山方干金州客

瓜步早潮吞建業蒜山晴雪照揚州朱文長

樹隔五陵秋色早水連三晉夕陽多張喬

人名

草生元亮徑花暗子雲居王績田家

雲藏神女館雨到楚王宮

皇甫冉巫山高

春山子敬宅古木謝敷家

朱文長贈別

江山清謝眺草木媚邱遲

張子容贈張司勳

去思今武子餘教昔文翁

釋皎然送李中丞

暮雨揚雄宅秋風向秀園

李郢園居

黃霸初臨郡陶潛未去官

李嘉祐江陰道中作

阮籍生涯懶嵇康意氣疎

王績思家

江遠武侯籌筆地雨昏張載勒銘山

唐彥謙興元沈氏庄

劉琨坐嘯風清塞謝眺裁詩月滿樓

武元衡酬嚴司空見寄

寫景

人煙寒橘柚秋色老梧桐

李白

樹交花兩色溪合水重流

蔣別南溪別業

鳥歸沙有跡帆過浪無痕

賈島江亭晚望

江樹臨洲晚沙禽對水寒

劉長卿七里灘

秋應為紅葉雨不厭蒼苔

李義山

霜空極天靜寒月帶江流

張說

風度蟬聲遠雲開鴈路長

隋王胄雨晴

草木窮秋後山川落照時

杜牧寄友人

就暖風光偏着柳辭寒雪影半藏梅

馬懷素應制

春融只恐乾坤醉水閣深知世界浮

羅隱春日湘中題岳麓寺

詠物

白波吹粉壁青嶂挿雕梁

杜甫嚴公廳事
岷山沈江圖

綠攢傷手刺紅墮斷腸英

朱餘慶薔薇

影高羣木外香滿一輪中

張薦月中桂

氣蒙楊柳重寒勒牡丹遲

劉得仁春雨

小葉風吹長寒花露濯鮮

符子珪芳樹

千載白衣酒一生青女霜

羅隱詠菊

雲凝巫峽夢簾閉景陽粧

誰憐一片影相失萬重雲

杜甫孤鴈

花間燕子棲鳩鵲竹下鸛鷀繞鳳凰

蘇頌寓直

鶴盤遠勢投孤嶼蟬曳殘聲過別枝

造理

病知新事少老別故交難

崔塗別故人

馬為賒來貴童因借得頑

姚合

雪晴山脊見沙淺浪痕交

章八元江行

樓高驚雨濶木落覺城空

李洞聽白公詒舊

興因樽酒洽愁為故人輕

張繼春夜皇甫冉宅勸酒

徑轉危峰逼橋斜缺岨妨

杜審言山池

為月窓從破因詩壁重泥

項斯題令狐處士溪居

寺遠僧來少橋危客過稀

許渾題韋處士山居

買栽池館恐無地看到子孫能幾家

羅鄴牡丹

自緣今日人心別未必秋香一夜衰

鄭谷十日菊

入畫

碧知湖外草紅見海東雲

杜甫

天晴一鴈遠海濶孤帆遲

李白送張舍人

松門天竺寺花洞若耶溪

張籍送盧處士遊吳越

山昏函谷雨木落洞庭波

許渾送人南遊

山遠疑無柱湖平似不流

韋承慶浮江

曉煙平似水高樹暗如山

雍陶塞上

桑柘晴川口牛羊落照間

呂溫宴別

驛道青楓外人煙綠嶼間

孫逖楊子江樓

春潮帶雨晚來急野渡無人舟自橫

韋應物滁州西澗

綠樹遶村含細雨寒潮背郭捲平沙

溫庭筠送人

典重

上公周太保副相漢司空

岑參送李太保

八荒開壽域一氣轉洪鈞

杜甫

氣蒸雲夢澤波撼岳陽城
孟浩然洞庭

黃閣開帷幄丹墀拜冕旒
錢起

地控吳襟帶才光漢縉紳
皇甫冉送常君赴昇州

聖藻垂寒露仙杯落晚霞
沈佺期應制

星月懸秋漢風霜入曙鐘
李嶠錢駱四

天勢圍平野河流入斷山
暢當登鶴雀樓

鑾輿迥出仙門柳閣道遙看上苑花
王維和御製

簾捲青山巫峽曉煙開碧樹渚宮秋
武元衡酬嚴司空見寄

清新

小桃初謝後雙燕恰來時

鄭谷杏花

貞為臺裏栢芳作省中蘭

包何寓直

一宵猶幾刻兩歲欲平分

曹松除夜

微月初三夜新蟬第一聲

白居易聞蟬

野色寒來淺人家亂後稀

羅隱秋浦

行到水窮處坐看雲起時

王維入山

曉日尋花去春風帶酒歸

李即少年行

樹初黃葉日人欲白頭時

白居易途中感秋

留連戲蝶時時舞自在嬌鶯恰恰啼

杜甫

蝴蝶夢中家萬里杜鵑枝上月三更

崔塗

奇偉

戟枝迎日動閣影助松寒

劉禹錫春日退朝

霜啼千里駿風翻九霄鵬

杜甫

蟄龍三冬卧老鶴萬里心

杜甫

風流峴首客花艷大堤倡

韓愈送李尚書赴襄陽

水聲巫峽裏山色夜郎西

李嘉祐送人

秦地吹簫女湘波鼓瑟妃

韓愈涼國公主挽詩

蓋海旗幢出連天觀閣開

韓愈送鄭尚書赴南海

壁壘依寒草旌旗動夕陽

郎士元早春登城

殘星數點鴈橫塞長笛一聲人倚樓

趙嘏

玉節在舡青海怪金函開詔拜夷王

姚合送源中丞赴新羅

綺麗

御鞍金騾褭宮硯玉蟾蜍

杜甫贈李秘書

風箏吹玉柱露井凍銀床

杜甫謁玄元皇帝廟

柳塘春水漫花塢夕陽遲

嚴維

舞鬟金翡翠歌頸玉螭螭

白居易獻裴令公

錦帳郎官醉羅衣舞女嬌

李白寄王漢陽

風暖鳥聲碎日高花影重

杜荀鶴春宮怨

酒綠市橋春漏閒宮殿午

李正封清明日

露曉紅蘭重雲晴碧柱高

許渾曉發寄李師晦

急管畫催平樂酒春夜宿杜陵花

韓翃贈張千牛

歌繞夜梁珠宛轉舞嬌春席雪朦朧

羅隱商於驛
東望有感

刻琢

露菊班豐鎬秋蔬影澗渥

杜甫夔府詠懷

墜露清金閣流螢點玉除

喬備長門怨

苦調琴先覺愁容鏡獨知

王適古別離

道進愁還淺年加睡卻輕

盧得仁秋夜寄友人

雲蔽望鄉處雨愁為客心

戴賊清溪館作

杜魄呼名叫巴江學字流

李遠送友人入蜀

雲迎出塞馬風捲渡河旗

沈佺期送人北征

雀聲花外暝客思柳邊春

溫庭筠江岸

五夜有心隨暮雨百年無節待秋霜

無名氏嘲失節婦

三台位缺嚴陵卧百戰功高范蠡歸

溫庭筠和友人題壁

自然

只因松上鶴便是洞中人

杜荀鶴訪道者不遇

今宵一別後何處更相逢

于武陵與故人別

飛來南浦水半是華山雲

于武陵贈王隱人

忽聞哀痛詔又下聖明朝

杜甫 叔京

承恩不在貌教妾若為容

杜荀鶴 春宮怨

共看今夜月獨作異鄉人

張湜 寄友人

有僧飛錫到留客話松間

冷朝陽 遊華嚴寺

羞將新白髮却對舊青山

于武陵 西歸

卻從城裏攜琴去許到山中寄藥來

賈島 送胡道士

朝廷有道青春好門館無私白日閒

薛能 獻僕射

寒苦

興幽松雪見心苦硯冰知

李洞感知上李侍郎

暮隨江鳥宿寒共嶺猿愁

許渾送客歸南溪

夜蛩偏傍枕寒鳥數移柯

劉真卿月下呈章秀才

澗冰妨鹿飲山雪阻僧歸

張喬山中冬夜

水聲冰下咽沙路雪中平

劉長卿

風冷衣裳脆天寒筆硯清

姚合秋月山中

雪嶺無人跡冰河足鴈聲

盧綸從軍行

塞迥連天雪河深徹底冰

馬戴邊將

冰橫曉渡胡兵合雪滿窮沙漠騎迷

趙嘏平戎

夜長簷雷寒無寢日晏厨煙冷未炊

豪壯

山河扶繡戶日月近雕梁

杜甫玄元皇帝廟

吳楚東南拆乾坤日夜浮

杜甫洞庭湖

黃山四千仞三十二蓮峯

李白送溫處士

天上白玉京十二樓五城

李白

虹截半江雨風驅大澤雲

王貞白雨後登庾樓

閶闔連雲起巖廊拂霧開

沈佺期元旦早朝

楚濶天垂草吳空月上波

張翥送人東歸

太液天為水蓬萊雪作山

宗楚客遇雪應制

伯仲之間見伊呂指揮若定失蕭曹

杜甫

帆飛楚國風濤闊馬渡藍關雨雪多

杜荀鶴辭鄭員外入關赴舉

工巧

浦轉山初盡虹斜雨半分

顧飛熊住杭州

木落山城出潮生海棹歸

喻坦之晚泊富春

古樹老連石急泉清露沙

溫庭筠處士盧岵山居

芋葉藏山徑蘆花間渚田

岑參晚泊五渡

岩狖牽垂果湍禽接迸魚

顧飛熊天河閣到啼猿閣即事

鳥歸花影動魚沒浪痕圓

悟清

樹勢連巴沒江聲入楚流

方干送姚合赴金州

水落金沙淺雲高玉葉疎

沈君道應令

暗香惹步澗花落晚影逼簾溪鳥回

羅鄴滄浪峽

野寺山邊斜有徑漁家竹裏半開門

李嘉祐送宋中書遊江東

精絕

月明三峽曙潮滿二江春

張循之巫山高

風清江上樹霜洒月中砧

僧貫休

風兼殘雪起河帶斷水流

于良史冬月晚望

客尋朝磬至僧背夕陽歸

崔峒崇福寺

客帆和鴈落霜葉向人飛

羅隱東歸途中作

雪侵帆影落風逼鴈行斜

趙嘏江行

晚秋淮上新月楚人家

劉方平淮上秋夜

晚色寒蕪遠秋聲候鴈多

權德輿送人

楊柳風多潮未落蘆葭霜在雁初飛

趙嘏長安與友生話舊

燕知社日辭巢去菊為重陽冒雨開

皇甫冉秋日東郊

閒適

水春雲母碓風掃石楠花

李白送內尋廬山女道士

硯和青靄凍簾對白雲垂

喻坦之寄姚少府

湖聲蓮葉雨野色稻花風

張籍送人及第歸越

子能渠細石吾亦沼清泉

杜甫

趁鐘開靜戶帶葉捲殘書

周賀酬吳處士

浥露收新稼迎寒葺舊廬

皇甫冉送王山人歸別業

竹影攜琴入花邀載酒過

孟浩然山池

地深新事少官散故交疎

周賀贈盧長史

閒花半落猶邀蝶白鳥雙飛不避人

方干題睦州環溪亭

蒼苔濁酒林中靜碧水春風野外昏

杜甫漫興

幽野

樹深時見鹿溪午不聞鐘

李白訪戴道士

樹停沙島鶴茶會石橋僧

周賀贈朱餘慶

簷前花覆地竹外鳥窺人

祖詠清川別業

寺分一派水僧鎖半房山

裴說道林寺

泉湧堦前地雲生戶外峯

僧靈一宿天柱觀

一徑野花落孤村春水生

杜甫

曲徑通幽處禪房花木深

常建破山寺

窓接停猿樹岳飛浴鶴泉

溫庭筠寄僧

澄江月上見魚擲花徑葉乾聞犬行

周賀江館書事

隔岸雞鳴春耨去隣家犬吠夜漁歸
方干山中言

羈旅

雞聲荒戍曉雁過古城秋
許渾泊松江渡

雞聲茅店月人跡板橋霜
溫庭筠早行

寒樹鳥初動霜橋人未行
劉禹錫途中早發

客淚題書落鄉愁對酒寬

對酒惜餘景問程愁亂山
戴叔倫逢董校書

燈影秋江寺蓬聲夜雨舡
溫庭筠送僧

見鴈思鄉信聞猿積淚痕

岑參已南舟中即事

衆鳥已歸樹旅人猶過山

任藩旅次

楚水晚涼催客早杜陵秋思傍蟬多

周賀遊南塘寄王知白

鴈飛南浦砧初斷月滿西樓酒半醒

夏竦爲夏江城

佳境

岩花點寒溜石磴掃春雲

權德輿宿栖岩

山光悅鳥性潭影空人心

常建破山寺

碧溪風澹態芳樹雨餘姿

杜牧途中作

煙峯高下翠日浪淺深明

唐太宗春日登眺

江村片雨外野寺夕陽邊

岑參曉發五渡

溪中雲隔寺夜半雪添泉

項斯寄石橋僧

露曉薰葭重霜晴橘柚垂

許渾曉發寄人

河漢秋生夜杉梧露滴時

馬戴宿僧房

輕煙不入宮中樹佳氣常薰仗外峯

錢起從駕幸甘泉宮

樹色漸分雙闕裏漏聲遙在百花中

皇甫曾早朝

警策

竹陰行處密僧臘別來高

張喬僧房

川迴吳岫失塞澗楚雲低

皇甫冉送人

鴈斷知風急湖平得月多

白居易松江亭

樹隔朝雲合猿窺曉月啼

李嘉祐送人

草礙人行緩花繁鳥度遲

盧照鄰山行

山帶新晴雨溪留閨月花

戎昱閨春宴溪庄

客為忙多去僧因飯暫留

白居易贈韋山人

樹隔高關斷天連大漠空

李頻送人往塞北

鴈行雲接參差翼庭樹風開次第花

章孝標贈劉侍御三子弟同時及第

文章舊價留鸞掖桃李新陰在鯉庭

楊汝士壓倒元白之句

引帶

春山和雪靜寒水帶水流

趙嘏送人歸觀

飛花隨蝶舞艷曲伴鶯嬌

李嶠春日應制

孤城向水閉獨鳥背人飛

劉長卿餘干旅舍

踈簾看雪捲深戶映花關

韓翃題僧房

溪浪和星動松陰帶鶴移

杜荀鶴宿僧院因贈

秋水牽沙落寒藤抱樹踈

庾信窮秋

凍柳含風落寒花照日鮮

劉孝標

巢鶴和鐘呖詩僧倚錫吟

鄭谷題興善寺

月轉碧梧移鵲影露低紅葉濕螢光

許渾宿望亭驛寄蘇州同遊

橋通小市家林近山帶平湖野寺連

韓翃送冷朝陽歸上元

連珠

句中字相對

百年雙白鬢一別五愁螢

四年三月半新笋晚花時

元稹題褒城驛

遠山芳草外流水落花中
司空曙鮮于秋林園

千峰孤燭外片雨一更中
韓翃夜宴

空城流水在荒澤舊村稀
李嘉祐

萬水千山路孤舟盡日程
賈島

窓燈寒几淨簷雨曉階愁
楊衡

五湖三畝宅萬里一歸人
沈佺期詩

疊嶂懸流平地起危樓曲閣半天開
劉憲山莊應制

積水長天迷遠客荒城極浦足寒雲
皇甫曾送李錄事

合璧 句中意相關

舟移城入樹岸闊水浮村

岑參泛漢陂

沙平寒水落葉脫晚枝空

褚亮喜霽

霧捲晴山出風恬晚浪收

李嶠初霽

徑滑苔粘履潭深水沒篙

白居易獻裴令公

砌冷蟲喧坐簾疎月到床

岑參送鄭侍御

山曉雲和雪汀寒月照霜

皇甫冉送權驛

海曙雲浮日江遙水合天

劉滄發浙江

簷燕酬鶯語庭花雜絮飄

姚合

風傳鼓角霜侵戟雲捲笙歌月上樓

許渾將南行陪崔尚書宴

三春月照千山路十日花開一夜風

溫飛卿

實字粧句

日月低秦樹乾坤繞漢宮

杜甫

樹翳樓臺月帆飛鼓角風

周繇送薛尚書

沙岸江村近松門山寺深

孟浩然送人

茶爐天姥客碁席剡溪僧

溫庭筠宿僧寺

銀龍銜燭燼金鳳起爐煙
蕭放冬夜對妓

冰城朝浴鐵地道夜銜枚

殘藥沾雞犬靈香出鳳麟
顧況

玉檢茱萸匣金泥蘇合香
吳均秦王捲衣

旌旗日暖龍蛇動宮殿風微燕雀高
杜甫早朝

潮生水國薰葭響雨過山城橘柚踈
許渾

虛字粧句

長貧惟要健漸老不禁愁
張籍寄王中丞

已行難避雪何處合逢花

身外唯須醉人間半是愁

司空曙

飄飄搏擊便容易往來遊

杜甫

未滿先求退歸閒不厭貧

李嘉祐送房明府

乍見翻疑夢相悲各問年

錢起

與世長疎索唯僧得往還

朱慶餘

只憂連夜雨又過一年春

李敬方飲酒

艷麗最宜新着雨嬌饒全在欲開時

鄭谷海棠

漸老更思深處隱多閒惟借上方眠

賈島

首用虛字

無風雲出塞不夜月臨關

杜甫

無人花色慘多雨鳥聲寒

李嘉祐江陰道中

以吾為世舊憐爾繼家風

李嘉祐送張秀才

出關逢落葉傍水見寒花

李嘉祐送韋九往濠州

到江吳地盡隔岸越山高

僧處默吳越紀事

似煖花消地無聲玉滿堂

李景春雪

載酒尋山宿思人帶雪過司空曙贈李端

無邊落木蕭蕭下不盡長江滾滾來杜甫

但將酩酊酬佳節不用登臨怨落暉杜牧之九日

上三下二七言上五下二

野店寒無客風巢動有禽周繇送宇文虞

似梅花落地如柳絮因風王淡交雪詩

送終時有雪歸葬處無雲任藩哭友人

永夜角聲愁自語中天月色好誰看杜甫宿府

輕重對

意高則不覺

江流天地外山色有無中

王維漢江

獨來成悵望不去泥欄干

唐彥謙惜花

自當舟楫路應濟往來人

張衆甫三州渡

桑麻深雨露燕雀半生成

杜甫屏跡

三分割據紆籌策萬古雲霄一羽毛

杜甫

門臨蒼莽經年閉身遠嫖姚幾日歸

李嘉祐

宋朝警句

五言

野水無人渡孤舟盡日橫

冠萊公

山勢蜂腰斷溪流燕尾分

夏英公

柳間黃鳥路波底白鷗天

蔡天啟

井泉分地脉砧杵共秋聲

徐鉉

峯多巧障日江遠欲浮天

東坡

一鳩鳴午寂雙燕語春愁

陳傳道

溪聲長在耳山色不離門

李濤

掃地樹留影拂床琴有聲

李濤

手香橙熟後髮脫草枯時

唐子西

片雲明外暗斜日雨邊晴

一朝厭蝸角萬里騎鵬背

洪龜父

着衣輕有暈入水淡無痕

徐忻

新霜染楓葉皓月借蘆花

楊徽之

境閒僧度水雲靜鶴歸松

惠崇

驚蟬移古柳鬪雀墮寒庭

惠崇

寒禽棲古柳破月入微雲

惠崇

曙分林影外春盡鳥聲中

蔡懋

去路正黃葉別君堪白頭

僧惟鳳秋日送人

雨勢宮城闊秋聲禁樹多

劉筠直禁中

七言

船中間雁洞庭夜床下有蛩長信秋

錢昭度

風前有恨梅千點溪上無人月一痕

吳可

雲埋山麓藏秋雨葉脫林梢帶晚風

陳知默

樹移午影重簾靜門對春風十日閒

呂居仁

鶴歸已改新城郭牛卧重尋舊墓田

錢熙送人拜掃

干斗氣沉龍已化置窮人去榻猶懸

晏元獻送人知洪州

偶題巖石雲生筆閒遶庭松露濕衣

楊徽之僧舍

遊魚顧影驚寒月宿鷺迷羣下夕陽

蔡九峯白蓮

靜尋啄木藏身處閒看遊絲到地時

綠章封事緘初啟青鳳來凰尾乍開

丁謂芭蕉

窺人鳥喚悠颺夢隔水山供宛轉愁

荆公午枕

細數落花因坐久，緩尋芳草得歸遲。

荆公

一水護田將綠遶，兩山排闥送青來。

荆公

隴鴈半驚天，在水征人相顧月如霜。

王君玉聞角

萬壑松聲山雨過，一川花氣水風生。

沙軟綠頭相並鴨，水深紅尾自跳魚。

高子勉

客子光陰詩卷裏，杏花消息雨聲中。

陳去非

負郭生涯千畝竹，長年心事四愁詩。

石敏若

千里江山漁笛晚，十年燈火客氈寒。


石敏若

桃李春風一盃酒江湖夜雨十年燈

山谷

雪意未成雲着地秋聲不斷鴈連天

錢惟演



詩人玉屑卷三